



**Govor Hide Bišćevića,
generalnog sekretara Vijeća za regionalnu saradnju**

**Međunarodni seminar
Jugoistočna Evropa kroz 20 godina:
Transformacija iz državnih u javne emitere**

Sarajevo, 14. novembar 2011. godine

Vaša ekscelencijo ministre Vidović,

Gospodo generalna direktorice Evropske radiodifuzne unije,

Gospodine glavni savjetniče Evropske komisije,

Gospodine predsjedniče Udruženja javnih servisa Jugoistočne Evrope,

Generalni direktori, pomoćniku ministra, predstavnici vlada, regualtora, civilnog društva,

Drage kolege,

- Čast nam je da vam zaželimo dobrodošlicu u Sarajevo, u Sekretarijat Vijeća za regionalnu saradnju (RCC), na **međunarodni seminar „Jugoistočna Evropa kroz 20 godina: Transformacija iz državnih u javne emitere“** kojeg organiziramo u saradnji sa Direkcijom za proširenje Evropske komisije i uz podršku Evropskog udruženja javnih servisa Jugoistočne Evrope i Evropske radiodifuzne unije (EBU).
- Hvala vam svima što ste došli i učinili ovaj skup mogućim.
- Posebnu zahvalnost dugujem **Evropskoj komisiji** koja je i finansijski i kroz značajan angažman svog osoblja podržala seminar te tako potvrdila svoju spremnost da omogući transformaciju u regionu ka stabilnim, modernim, pluralističkim demokratijama koje u potpunosti obuhvataju vrijednosti Evropske unije.

- Ovaj seminar je, prema tome, organiziran kao odgovor na konferenciju Evropske komisije pod nazivom „Pusti glas!“ o slobodi izražavanja i medija održanoj u maju 2011. godine u Briselu na kojoj je značajna pažnja posvećena važnosti javnih servisa.
- Skup je također omogućen zahvaljujući stalnoj i aktivnoj podršci **Udruženja javnih servisa Jugoistočne Evrope i Evropske radiodifuzne unije** koje su pokazale iskrenu posvećenost povećanju regionalne saradnje među javnim servisima.
- Radi se o **sveuključujućem pristupu**, kako u pogledu zastupljenosti iz svih dijelova Jugoistočne Evrope, tako i u pogledu svih relevantnih aktera u našim društvima, koji je presudan za uspjeh naših napora.
- Činjenica da se danas, u Sekretarijatu Vijeća, okupilo **preko pedeset visokih zvaničnika javnih servisa, regulatora, vlada i civilnog društva iz dvanaest zemalja članica Vijeća iz Jugoistočne Evrope**, zajedno sa zvaničnicima iz relevantnih međunarodnih organizacija, sa jednim ciljem – da se podrži nezavisnost i održivost javnih servisa u regionu – govori mnogo toga.
- Govori da se region, uprkos oscilacijama u političkim i socio-ekonomskim prilikama u Jugoistočnoj Evropi, ipak kreće naprijed kako na polju evropskih integracija tako i u pogledu regionalne saradnje. Štaviše, regionalna saradnja ulazi u fazu u kojoj bi regionalno vlasništvo trebalo postati odskočna daska ka regionalnoj odgovornosti u funkciji dugotrajne stabilnosti u regionu.
- Perspektiva za članstvo koju nudi Strategija proširenja EU za 2011.-2012. predstavlja snažan poticaj za cijelu Jugoistočnu Evropu. U njoj se značajna pažnja posvećuje slobodi izražavanja u medijima, sa posebnim akcentom na potrebu da se poboljša **ekonomska pozicija i autonomija javnih servisa** kako bi mogli ispunjavati svoju ulogu.
- Okupljajući cijeli region oko praktične saradnje okrenute ka rezultatima, Vijeće za regionalnu saradnju i njegov Sekretarijat doprinose napretku u okviru ove perspektive. Prepoznali smo nezamjenjivu ulogu javnih servisa u promociji regionalne saradnje, izgradnje slobodnog, demokratskog, pluralističkog, tolerantnog i uključujućeg društva, ali i izazove s kojima se suočavaju u ispunjavanju svoje uloge. Oni su jedan od najjačih kanala za produbljivanje dijaloga, pomirenje i izgradnju međusobnog povjerenja u Jugoistočnoj Evropi.

Dame i gospodo,

- Jugoistočna Evropa i njeni emiteri su, uprkos često veoma teškim uslovima, ipak prešli dugačak put tokom proteklih dvadeset godina transformacije sa državnih na javne emitere. Transformacija u okolnostima složenog nasljeđa prošlosti, što je zahtijevalo ozbiljnu promjenu mentaliteta i vrijednosti, nije bila jednostavna. Napredaj je, međutim, uprkos poteškoćama, očigledan.
- Tokom samo prethodne tri godine koliko postoji Vijeće za regionalnu saradnju, zemlje iz regiona su pokazale jaku želju za regionalnom saradnjom i promjenom fokusa – sa animoziteta i nesporazuma prošlosti na dijalog i prevazilaženje poteškoća. Ovo obuhvata različite segmente društva, uključujući i javne emitere.
- Prije godinu dana **Sekretarijat Vijeća i EBU su po prvi put okupili emitere, državne zvaničnike, regulatore i stručnjake iz Jugoistočne Evrope na međunarodnoj konferenciji u Sarajevu**. Učesnici konferencije su se dogovorili da javni servisi iz regiona trebaju postati pokretači tehnološkog, ekonomskog, političkog i kulturnog razvoja svojih zemlja, pri tome podržavajući njihovu integraciju u evropske i evro-atlantske institucije, kao i regionalni razvoj.
- U skladu sa zaključcima prošlogodišnje konferencije, na narednom sastanku **u Novom Vinodolskom u novembru 2010. godine osnovano je Evropsko udruženje javnih servisa Jugoistočne Evrope**, kao neprofitno strukovno tijelo javnih servisa u regionu. Njegovo osnivanje je podržalo Vijeće za regionalnu saradnju.
- Radujemo se da je Udruženje već poduzelo konkretne korake u tom smjeru, što je nedavno – 30. septembra 2011. godine, upravo u ovim prostorijama – ilustrirano potpisivanjem **Protokola o regionalnoj saradnji u oblasti edukacije i obuke** između njegovih dvanaest članica. Vijeće je ponosno omogućilo ovaj proces i radujemo se realizaciji pomenutog Protokola.
- Danas ćemo sa velikim interesom slušati vaše stavove o osiguranju finansijske stabilnosti i nezavisnosti javnih servisa, uključujući i kroz čvrst pravni okvir, tržišnoj konkurentnosti, sprječavanju političkog uplitanja i upravljačke nestabilnosti, stvaranju i održavanju visokih profesionalnih standarda, kao i o sprječavanju opasnosti od nestanka javnih servisa, te načinima osiguranja njihovog istaknutog mjesta na tržištu medija u

budućnosti, te pri tome razmijeniti problematična pitanja i prijedloge konkretnih budućih aktivnosti.

- Mi ćemo sa naše strane nastaviti da sa Evropskom komisijom, EBU-om i Udruženjem podržavamo dugoročnu ključnu ulogu javnih servisa na medijskom tržištu i u društvima zemalja Jugoistočne Evrope. Također pozdravljamo predstojeću provedbu projektne komponente Centralnoevropske inicijative usmjerene na poticanje razumijevanja, dijaloga, pomirenja i dobrosusjedskih odnosa u Jugoistočnoj Evropi kroz javne servise, koja je pripremljena u saradnji sa Sekretarijatom Vijeća.
- Radujemo se daljem radu sa svima vama i želim nam uspješan seminar.
- Hvala vam na pažnji.